

卷七  
聖孝一

治典訓初集



政治典訓初集卷第七

聖孝一

○康熙六年十月庚子

上諭禮部曰。朕惟敦本為王化之原。



治之大。遵典禮而致顯揚。所以伸敬養之至意也。朕繼承洪基。躬親政務。惟我

聖祖母昭聖慈壽恭簡安懿章慶敦惠溫莊太  
皇太后



聖母仁憲恪順皇太后。佑啟多方。恩勤備至。聖慈深厚。酬報未能。茲欲敬展孝思。宜進尊崇之號。謹加上

太皇太后徽號曰

昭聖慈壽恭簡安懿章慶敦惠溫莊康和太皇太后。加上

皇太后徽號曰

仁憲恪順誠惠皇太后。昭令德於萬年。廣孝道

於天下。爾部即遵諭行。

○康熙八年正月戊申

上諭工部曰。朕奉

太皇太后諭。謂清寧宮乃保和殿也。基址崇高。原非燕寢之地。且以殿為宮。予心未愜。命輔政大臣。偕內院禮部。率欽天監諸臣善相地者。詳加審度具奏。今諸臣奏言考據典故。宜居乾清宮。

太皇太后是其議。謂乾清宮交泰殿棟樑朽壞。宜撤舊重建。以為朕宮。慈命諄復。朕不敢違。但陶唐茅茨不剪。夏禹宮室是卑。其毋事華麗。止令樸質堅固。以稱太皇太后惓惓至意。

○康熙九年二月辛未

上奉

孝康慈和莊懿恭惠崇天育聖皇后神位升祔

太廟。復

諭禮部曰。

慈和皇太后誕育朕躬。未遂孝養。思慕之忱。每切於懷。雖已上

尊謚。今升祔

太廟。配食

皇考。典禮關係重大。其應進

謚號。議政王貝勒大臣九卿科道會同詳議以

聞。於是議政王等請加上

尊謚曰

章皇后。

丁亥

上諭禮部曰。

皇考升遐。倏歷十載。罔極之恩。時恫於懷。

山陵在望。未一展祭。尤切悽愴。朕擬於今歲八

月恭行謁

陵禮。又奉

太皇太后諭旨。以思念情殷。亦欲詣

陵。朕敬遵

慈命。躬侍以行。其應舉行典禮。爾部詳議以聞。

○康熙十年八月甲申

上諭禮部曰。朕仰體

世祖章皇帝遺志。欲躬詣

太祖

太宗山陵展祭。以告成功。前命議政王貝勒大臣等會議。議政王等以去年四方多有水旱之災。且為時甚迫。應用之物。難以預備。奏請暫行停止。今思

太祖

太宗創業垂統。功德隆盛。

山陵在望。刻不能忘。去年恭謁孝陵禮成。今已數月。若更久延時日。孝思莫殫。

朕懷時切靡寧。茲當海內無事。欲乘此時躬詣

太祖

太宗山陵。以告成功。用展孝思。事關大典。議政王貝勒大臣內閣九卿科道各官會議以聞。

○九月丁卯

聖駕幸盛京。戊辰。詣

福陵告祭。庚午。詣

昭陵告祭。辛未。遣王貝勒內大臣致祭永陵。是日大禮告成。

上顧侍臣曰。朕久欲展謁山陵。夙夜惓惓。今得祭告寢園。素懷始慰。又

諭守

陵諸臣曰。爾等職司祀典。凡諸祭品。必身自虔視。克誠克敬。副朕孝思。

○康熙十一年八月壬戌

上奉

太皇太后幸遵化溫泉。扶掖升降。備極孝敬。既

十月乙巳。聞

皇后違和。

上諭學士傅達禮曰。前京城來奏皇后有恙。朕召太醫院官武超眾。問以方藥。諭之云。朕以太皇太后聖躬違和。奉駕來幸溫泉。若得

太皇太后霍然全愈。朕懷方慰。爾等其勿妄奏。恐致

太皇太后憂慮。乃武超衆不解朕意。遽爾奏聞。蒙

太皇太后慈諭云。我已痊愈。中宮有恙。可往視之。朕奏云中宮雖病。自有定數。臣去亦無益。况臣特奉

太皇太后来此。豈可先歸。適京師又有奏至。云

皇后病劇。

太皇太后慈諭云。中宮病劇。可速往視。若病勢痊可。不妨再來相迎。爾奉我同行。固為孝思。遵命前往。亦孝道也。朕不敢違

慈旨。即刻起行。一視皇后。仍即來迎。於是命駕馳行還京。越二日丁未。上復馳至邦均。迎見太皇太后。以



皇后病痊奏聞。遂隨侍回鑾。

○康熙十二年五月乙亥

上詣

太皇太后宮問安出。

天顏悅豫。

諭學士傳達禮曰。朕近因

太皇太后聖體少有違和。不時省問。昨躬奉湯藥。今來請安。幸已大愈。朕心方慰。頃又進滋

補之劑矣。是日復兩詣

太皇太后宮問安。

○九月乙亥

上諭起居注官胡密子曰。朕適詣

太皇太后宮問安。

太皇太后問朕曰。頃者地動。爾知之否。朕奏曰。

此乃

天心垂異以示警也。

太皇太后諭曰。人君遇有災異。固當益加修省。然亦在平時用人行政。敬承

天意耳。朕仰繹

慈訓。誠為克謹天戒之要也。

○十二月己亥

上諭內閣曰。朕奉

太皇太后慈旨。

世祖章皇帝妃博爾濟錦氏。博爾濟錦氏。博爾

濟錦氏。董鄂氏。久在宮闈。敬謹夙著。宜加封號。以表令儀。朕恪遵

慈諭。今尊

皇考妃博爾濟錦氏曰

皇考恭靖妃。

皇考妃博爾濟錦氏曰

皇考淑惠妃。

皇考妃博爾濟錦氏曰

皇考端順妃。

皇考妃董鄂氏曰

皇考寧謚妃。內閣禮部會議典禮以聞。

○康熙十四年四月辛亥

上諭學士傅達禮。侍讀學士喇沙里曰。朕向詣  
兩宮問安。爾等起居注官常隨行記注。朕思昏  
定晨省。問安視膳。趨侍庭闈。以盡孝道。乃為  
子孫者之恒禮。豈容一日有間。嗣後朕詣

兩宮問安時。侍直官不必隨行。

○十一月辛亥

上諭禮部曰。朕惟建儲以重國本。晉號以篤尊  
親。慶典告成。隆儀式舉。所以彰懿德而展孝  
忱也。朕繼承丕緒。夙夜兢兢。仰惟

聖祖母昭聖慈壽恭簡安懿章慶敦惠溫莊康  
和太皇太后。暨

聖母仁憲恪順誠惠皇太后。教育恩深。顯揚罔

既茲者恪遵

懿旨。冊立東宮。念主器之得人。皆

慈恩之垂裕。宜宣

盛德。用著鴻章。謹加上

太皇太后徽號曰

昭聖慈壽恭簡安懿章慶敦惠溫莊康和仁宣

太皇太后。加上

皇太后徽號曰

仁憲恪順誠惠純淑皇太后。昭徽音於奕世。廣

孝治於多方。爾部即擇吉具典禮以聞。

○康熙十六年十二月己巳

上親撰元日慶賀

太皇太后表文曰。康熙十六年十二月二十七

日。孫皇帝臣誠懼誠忤稽首頓首上言。伏以

聖慈垂裕。啟萬年光大之圖。

景運維新。極四海尊親之戴。溥

鴻恩於庶類。配坤德之無疆。錫懿訓於孫謀。比春暉之有耀。欣逢令節。敬展微忱。恭惟

聖祖母昭聖慈壽恭簡安懿章慶敦惠溫莊康和仁宣太皇太后陛下

純仁積慶。

盛德凝庥。

高厚難名。至道永符於覆載。

禎祥駢集。遐齡常竝乎升恒。值寶曆之方亨。

仰璇階之正泰。謹奉觴而介

壽。爰製錦以伸懷。膝下本支。百世常看戲綵。

宮中堯舜。萬方共覩垂裳。率土同歡。普天咸

忭。臣夙承

教誨。永沐

涵濡。瞻

繡服之光華。樂

慈顏之康豫。伏願

崇禧益茂。

眉壽增隆。昭

徽範於子孫。享昌後燕天之盛。廣嘉祉於民  
物。彰欽時錫福之仁。臣踴躍歡忭之至。謹奉

表稱

賀以

聞。

○康熙十七年二月己酉

太皇太后聖誕。

上親撰慶賀表文曰。康熙十七年二月初八日  
孫皇帝臣誠懽誠忭稽首頓首上言。伏以

慈德同天。五福集箕疇之盛。

遐齡配地。萬方騰嵩祝之聲。岡陵獻瑞於

瑤階。永符安吉。日月呈輝於

寶算。常竝升恒。遠邇尊親。寰海忻忭。恭惟

聖祖母昭聖慈壽恭簡安懿章慶敦惠溫莊康  
和仁宣太皇太后陛下

性成至德。

躬備純禧。

懿訓弘深。範累朝而作則。

恩施高厚。含萬物而化光。啟景運於維熙。正

期願之方茂。南極光連寶婺。

隆名永戴。

重闈。東風慶入堯年。佳氣恒瞻二月。肅綺筵而

介壽。捧玉醴以稱觴。藉庭實之微儀。冀

慈顏之一顧。懽生殿陛。喜溢階墀。臣祇奉

誨言。仰承鞠育。合臣民之頌祝。率子姓以賡揚。

伏願

福嘏無疆。

壽祺增盛。

玉冊煥千秋之彩。

徽音偕星漢同昭。瑤池垂五色之雲。景祐與  
乾坤成泰。臣踴躍歡忭之至。謹奉

表稱  
賀以

開。

○康熙二十年十二月丁酉

上諭禮部曰。獻歲

太皇太后壽屆七袞。游臻景福。諸王大臣宜行

慶賀之禮。各視官爵為差。其進賀日期。爾部  
選定以聞。

○庚子

上諭禮部曰。朕惟戡定本啟佑之恩。顯揚備尊  
親之禮。成功既告。盛德宜彰。所以展孝忱。昭  
慶典也。逆賊吳三桂背恩反叛。數年以來。朕  
仰承

聖祖母昭聖慈壽恭簡安懿章慶敦惠溫莊康



和仁宣太皇太后。暨

聖母仁憲恪順誠惠純淑皇太后慈訓。勅除叛  
亂。克奏教寧。思上答乎

弘仁。應進崇夫

顯號。謹加上

太皇太后徽號曰

昭聖慈壽恭簡安懿章慶敦惠溫莊康和仁宣  
弘靖太皇太后。

皇太后徽號曰

仁憲恪順誠惠純淑端禧皇太后。播徽音於四  
海。介景福於萬年。爾部即擇吉具儀以聞。

○癸卯

上以天下蕩平。加上

太皇太后

皇太后徽號。率諸王大臣侍衛文武大臣等。詣  
兩宮恭進冊寶行禮。先是

上遣閣臣勒德洪明珠詣

慈寧宮奏上加

徽號禮儀。

太皇太后諭曰。自叛逆構亂。於今八年。皇帝焦  
心勞思。運奇制勝。故得寇盜削平。海宇寧謐。  
皆是皇帝蕩定邊方。綏輯天下。勲莫大焉。皇  
帝應受尊號。以答臣民之望。予處深宮之中。  
外事槩不與聞。乃受尊號。於心未愜。此典禮

不必行。勒德洪等奉

太皇太后旨還奏。

上復遣詣

太皇太后宮奏曰。歷稽往代。國家凡有大慶。必  
歸美於

尊親。

太皇太后鑒臣微忱。特允奏請。臣雖無尊號。傳  
示中外。亦有光榮。

太皇太后諭曰。皇帝實有大功於天下。尚不受尊號。予以婦人。未有功德於臣民。倘受徽號。實覺難安。若必欲行此典禮。但加崇皇太后可也。勒德洪等還奏。

上復遣詣

太皇太后宮奏曰。自寇亂用兵以來。將士疲勞。生民困苦。瘡痍未復。喘息未蘇。雖兵戈乍戢。疆宇初平。國家紀綱。正宜整頓。地方元氣。正

宜培養。臣何敢宴然自處。以為太平無事。受納尊號。惟祈

太皇太后聖心懽豫。俯體羣情。允行大典。臣實幸甚。天下幸甚。

太皇太后曰。皇帝既惓惓懇請。至於再三。予亦不能固辭。可照禮儀行。至是舉行大典。頒詔天下。

○康熙二十一年正月乙丑

上諭禮部曰。比年以來。逆賊吳三桂。背恩反叛。擾亂地方。仰荷

祖宗在天之靈。默垂庇佑。克奏蕩平。應恭詣

山陵展祭。以告成功。前初聞捷音。即謁

孝陵行禮。茲奉

太皇太后慈諭。

太祖太宗山陵。應親往祭告。隨命議政王貝勒大臣

等會議。僉謂事關大典。允宜舉行。今擬即恭謁

太祖

太宗山陵。虔申昭告。用展孝思。應行事宜。及需用諸物。着各該衙門速行整備。爾部即遵諭行。既二月癸丑。祭告

福陵。乙卯。祭告

昭陵。俱如康熙十年告祭禮。己未。

上親率諸王大臣等詣  
永陵行告祭禮。

○康熙二十二年四月丙子工部奏請修  
孝陵五空橋甬道。估計工價。

上曰。

陵寢至重。前監修各官草率修理。因致損壞。今  
若以節省之故。估價短少。恐錢糧不敷。以舊  
存磚石充用。必不堅固。寧使價值寬餘。務為

永久之計。其命董修官詳勘再議以聞。

○康熙二十三年十月己酉

上南巡。駐蹕郟城紅花鋪。內發食物付兵部  
諭曰。此進

太皇太后黃河鮮魚。及地方土產鮮菓諸物。沿  
途可加敬慎。迅速馳送。毋得遲緩。

○康熙二十四年九月乙亥

上奉

太皇太后慈旨。幸白塔寺。將行。大雨。近侍奏曰。  
道路沉澁。請俟少霽行。

上曰。近因

聖祖母偶爾違和。朕心深切憂慮。今已痊愈。甚  
爲慶幸。何憚此一往。不以仰慰  
慈衷乎。遂冒雨行。



